



Nivi Rosing
Inatsisartuni ilaasortaq, Inuit Ataqtigiit

Meeqqat atuarfianni oqoqarnera pillugu § 37 naapertorlugu apeqqummut nr. 219/2025-mut akissuteqaat

30-12-2025
Suliap normua 2025 - 9824
All. nr. 26060985

Postboks 1029
3900 Nuuk
Oqarasuaat: +299 34 50 00
Email: ikin@nanoq.gl
www.nanoq.gl

Asasara Nivi Rosing

Inatsisartut suleriaasiat naapertorlugu apeqqummut saqqummiussannut qujanaq. Apeqquitiit tullinnguuttuni akissuteqarfigissavakka.

1. Meeqqat atuarfii Nunatsinni qassit oqullutik matoqqappat?

Meeqqat atuarfii katillugit sisamat oqummik patsiseqartumik tamakkiisumik ilaannakortumilluunniit matoqqatinneqartut kommuninit Ilinniartitaanermut Aqutsisoqarfimmut ilisimatitsissutigineqarpoq. Atuarfik ataaseq ilaannakortumik matoqqatinneqarpoq atuaqatigiiaanut ataatsinut sunniuteqartumik. Atuarfiit pineqartut illoqarfinni ukunaniipput; Nuuk, Maniitsoq, Ittoqqortoormiit Qeqertarsuatsiaallu. Ittoqqortoormiini atuarfik ilaannakortumik matoqqavoq Nuummi atuarfiit pineqartut marluupput (Atuarfik Samuel Kleinschmidt aamma Ukaliusaq).

A. Nunatsinni meeqqat qassit atuarfiminni atuarsinnaanngillat atuarfiup oqoqarnera pequtaalluni?

Atuarfinni sisamaasuni siuliani taaneqartuni atuartut katillugit 1.295-it namminneq atuarfigisamik avataanni oquk patsisigalugu atuartinneqartarallarput.

2. Naalakkersuisut iliuuseqassamaarpas meeqqat atuarfii oquttut pillugit?

Meeqqat atuarfiani atugassarititat oqummik patsiseqartumik illorsuartaanut unammilligassaalersut ilanngullugit kommunit oqaloqatigalugit pitsanngorsarneqarnissaat Naalakkersuisut anguniagaraat. Susassaqartut tamaasa sapinngisamik suleqatiginiarsarineqarput, isornartorsiutinillu tunngavilersukkanik apuussiffigineqarsinnaallutik pitsanngorsaanissarluni siunertaralugu ataatsimiinnerit oqaloqatigiinnerillu aqutiginiartarlutik.

Tassunga atatillugu Kommune Kujallermini borgmesteri apeqqutit meeqqat atuarfianut tunngassuteqartut qitiutillugit ataatsimeeqatigineqarpoq. Taamatullu Kommuneqarfik Sermersuumi borgmesteri Nuummi atuarfinnut tunngasunik oqaloqatigiissutaasussanik ingerlataqarfiginiarneqarluni.

Aamma danskit ministerii aningaasaateqarfiillu atuarfinnut aningaasaliisinnaanissaat eqqarsaatigalugit ataatsimeeqatigisarpakkattaaq.

A. Immaqaluunniit akisussaaffik kommunit kisimik paarivaat?

Atuarfiit illutaasa oqummik eqqorneqarsimasut unammilligassartaasa aaqqiiffiginissaat kommunit akisussaaffigaat.

2025-mut aningaasanut inatsimmi konto pingaarneq 20.05.20-mi takuneqarsinnaasutut atualernissamut piareersarnissamut atuarfinnullu tunngasuni sanaartornernut kommunit ukiumut 100 mio. kr.-it missanik kommuninut ataatsimut tapiissutit aqutugalugit tapiiffigineqartarput. Pineqartunut tunngatillugu akisussaaffik Namminersorlutik Oqartussanit kommuninut 1. januar 2018-imit akisussaaffinngortinneqarsimavoq. Tassani ilaatinneqarlutik atuarfiit iluarsarneqartarnissaat aserfallatsaaliorneqartarnissaallu soorlu oquiaanerit, oquup malitsigisaanik iluarsartuussinerit kiisalu imermik/isugutammik isaasoqarsinnaajunnaarsinniarlugu taamaasilluni oquttoqalernissaa pinngitsoortinniarlugu atuarfiit illutaasa ilaanik iluarsartuussisernerit.

3. Inatsit naapertorlugu nunatsinni meeqqat ukiuni qulini atuartussaataapput. Tamanna atuarfiit oqoqarneri pequtugalugit naammattumik naammassineqarsinnaanngippat Naalakkersuisut pisussaaffeqanngillat iliuuseqassallutik?

Inatsit naapertorlugu meeqqat tamarmik ukiuni qulini atuartinneqarnissaminnut piginnaatitaapput. Atuarfiit initaasa oqunneri patsisigalugit atuartitsinerit naammaginnartumik ingerlanneqarsinnaatinnagit unammilligassalersut suliassatut pingaartutut tigullugit iliuuseqarnissaq pisariaqalersarpoq.

Kommunit atuarfiit illutaasa ingerlanissaannut aserfallatsaalineqarnissaannullu akisussaasuupput, kiisalu meeqqat Kalaallit Nunaanni atuartinneqarnissaannut pisinnaatitaaffitsik malillugu atuartinneqarnissaannut akisussaasuullutik. Naalakkersuisut kommunit aturfik pillugu Inatsisartut inatsisaanik aqutsinerannut tunngatillugu nakkutilliinissamut pisussaaffeqarput. Kommunit suliassanik naammassinnaannangikkaangata, Naalakkersuisut pisussaaffigaat tamanna saaffiginissutigissallugu. Naalakkersuisut aamma inatsisitigut aningaasatigullu sinaakkusersuinerit iluanni sulineq tapersersorsinnaavaat, ilaatigut ajornartorsiutit qaangerniarlugit suliniutinik assigiinngitsunik aallartisaarinikkut aammalu avataaneersunik suleqateqarnikkut.

Meeqqat tamarmik inini peqqinnartuni toqqissisimanartunilu atuartinneqartarnissaasa qulakkeerneqarnissaa naalakkersuinikkut pingaartitaavoq. Taamaammat massakkut ajornartorsiutaasut aaqqiiffigineqarnissaat meeqqallu atuarfiini init siunissaq eqqarsaatigalugu pitsanngorsaaffigineqarnissaat Naalakkersuisut sulissutigaa.

A. Naalakkersuisut nunanut allanut angalaneq salliunnagu meeqqat nunatsinni atuurfeqarnermikkut kipiluttunartumik inissisimasut aaqqiiffiginiarlugit politikikkut pingaarnersuinerminni suliaat nassuiaquara.

Nipit isorinnippalaartut Naalakkersuisutut akueralugit tigusinnaavakka. Meeqqat atuarfiini atugassarititat aaqqiiffiginissat meeqqallu pitsaanerpaamik atugassaqaarnissat suliassat pingaartilluinnakkama ilagaat.

Ilutigaluguli erseqqissaatigissavara nunatsinni nunanilu tamalaani angalallunga suliarisartakkakka meeqqanut pingaaruteqartorujussuusarmata. Angalanerit tamakku meeqqat atuarfiinut meeqqanullu kingusinnerusukkut periarfissanik nukissanillu tuniseqataalersinnaasarmata.

Naalakkersuisoqarfiup susassaqaarfigaa meeqqat atuarfiat, aammali nunaqavissut Kalaallit Nunaata avataani ilinniartut, inuusuttuaqqat efterskolertut il. il., taakkulu nunatta avataani sulianik ingerlataqaarnissanik pisariaqartitsilersinnaasarlutik.

Inussiarnersumik inuulluaqqusillunga



Nivi Olsen